

Vorzeiten die grösten vnd fürnembssten Schlachten gehalten worden / nebenst Vermeldung allerley denckwürdiger Geschichten / Wunderzeichen vnd anderer Miraceln so sich daselbsten allen zum Exempel vnd warnung das böse zu meiden / vnd dem guten zu folgen / zugetragen vnd verlauffen haben / also das ein jeglicher nach seinem Lust die örter selbst besehen vnd weitere nachfrag haben mag. Welches alles ich aus mancherley vnd vielen Authoribus in massen derer hernach bald im anfang gedacht wird / zusammen gezogen / mit sampt dem jenigen so auch kurtzlichen geschehen / vnd ich entweder selbst gesehen / gehört / oder dessen Mundlichen vnd Schriftlichen von Glaubwürdigen Leuten bin berichtet worden. Damit ich auch nun eine zimliche raume zeit hero vmbgegangen / bis ich solches alles in ein Buch / wie die Bienen ihr Honig im Birkorb / zusammen gebracht / das sich also der Leser an einem jedern ort zuerinnern wie es vor alters allda zugegangen vnd gestanden habe.

Solche langwirrige Arbeit aber Durchlauchtigster / Hochgeborner / Gnedigster Fürst vnd Herr / habe dem Churfürstlichen Hause Brandenburg vnd sonderlich K. F. D. als dieses schönen Fürstenthums vnd Landes Preussen / Hochlöblichem Regierendem Herrn vnd Vattern / ich in vnterthenigkeit zuschreiben vnd dediciren wollen / weil K. F. D. zu allerley antiquiteten Landtaffeln vnd Historien sonderlich Lust vnd gefallen treget / dieselben auch gern vnd mit grossem fleis liest / alle Fürstliche Hülff vnd Förderung thut / vñ keine Vnkosten sparet / damit solche diesem guten Lande zu Ruhm vnd bestem ans Liecht vnd vnter die Leute gebracht werden. Hiemit zum Vnterthenigsten bittende /
solch